



**JUDICIAL SYSTEM MONITORING PROGRAMME**  
**PROGRAMA MONITORIZASAUN BA SISTEMA JUDISIÁRIU**

**Komunikadu Impresa**

**Tribunál Distritál Baucau**

**16 Marsu 2017**

**Julgamentu movél iha Distritu Manatuto maioria julga kazu violénsia  
doméstika**

Iha 6 to'o 10 Marsu 2017, Tribunál Distritál Baucau realiza julgamentu movél iha Munisipiu Manatuto. Tuir agenda ne'ebé planea ona, Tribunál julga kazu 15 ne'ebé envolve kazu violénsia doméstika 7, ofensa ba integridade física simples 1, omisídu simples 1, danu simples no ameasa 1, danu ho violénsia 2, pekulatu de uzu 1 no danu agravadu 1.

Julgamentu movél ne'e konklui ho rezultadu oioin. Iha kazu violénsia doméstika tolu konklui ho pena prizaun maibé ninia ezekusaun suspendidu, pena multa ba kazu danu agravadu 1, no omologa dezisténsia keixa ba kazu kazu 2 ne'ebé kompostu hosi danu simples no ameasa 1, ofensa ba integridade física simples 1. Aleinde ne'e Tribunál móvel ne'e adia kazu ofensa ba integridade física simples 1, tanba arguidu la marka prezensa. Enkuantu ba kazu violensia doméstika 4, omisídu simples 1, pekulatu de uzu 1, danu ho violénsia 2, Tribunál marka fali agenda ba leitura sentensa iha Tribunál Distritál Baucau.

“JSMP apresia iniciativa Tribunál móvel ne'e, tanba kontinua promove asesu ba justisa atu nune'e komunidade sira ne'ebé hela dook hosi Tribunál fasil asesu ba julgamentu sira,” dehan Luis de Oliveira Sampaio, Diretor Executivo JSMP.

Iha julgamentu ne'e JSMP mós konversa ho lezada kazu violénsia doméstika, atu husu kona-ba lezada ninia hanoin kona-ba programa julgamentu movél ninia efetiviade. Lezada hatan katak nia sente kontente ho forma julgamentu hanesan ne'e, tanba sira hela do'ok hosi Tribunál, maibé ho julgamentu movél ne'e bele ajuda sira hamenus gastus ba transporte no akomadasaun durante tuir julgamentu.

Julgamentu movél ne'ebé realiza durante loron 5, aleinde julga kazu sira ne'ebé tama ona iha agenda, Tribunál mós intodus ba komunidade sira oinsa sistema justisa formal nia

Rua Beco Lakateu, Aldeia Manu fuik,  
Suku Colmera, Administrativu Vera Cruz  
Dili Timor Leste  
PoBox: 275  
Telefone: 3323883 | 77295795  
[www.jsmp.tl](http://www.jsmp.tl)  
[info@jsmp.tl](mailto:info@jsmp.tl)  
Facebook: [www.facebook.com/timorleste.jsmp](https://www.facebook.com/timorleste.jsmp)  
Twitter: @JSMPTl

funcionamentu. Hein katak ho prezensa regularmente Tribunál movél iha distritu sira komunidade sira bele sente katak justisa ne'e iha duni ba sira.

Julgamentu movél ne'e prezide husi juis Dr. Afonso Carmona, Dr. Jose Goncalves no Dra. Ercilia de Jesus. Ministériu Públiku reprezenta hosi Dr. Alfonso Lopez no Dr. Luis H. Rangel da Cruz no parte Defeza reprezenta husi Dr. Grigorio de Lima hosi Defensória Públika.

Atu hetan informasaun kompleitu bele kontaktu ba:

Luis de Oliveira Sampaio  
Diretor Ezekutivu JSMP  
Email: [luis@jsmp.tl](mailto:luis@jsmp.tl)